

嘉靖平倭祇役紀畧

第二冊 疏

卷之四

詩集

卷之四

詩集

卷之四

詩集

嘉靖平倭祇役紀畧卷二

慈谿趙文華原實甫著

條陳海防疏

題爲條陳會議海防長策事臣竊惟國家防
海之制謂之海防必宜防之于海猶江防者必
防之于江此定論也國初沿海每衛各造大
青及風尖八漿等船一百餘隻置出海指揮統
率官軍更番出洋哨守海門諸島皆有烽墩可

爲停船其後弛出洋之令列船港次浙東于定
海浙西于乍浦蘇松于吳淞江口及劉家河夫
乍浦之地海灘淺閣無山巒避風之處前月把
總周易等所領戰船被賊燒毀僅遺十餘隻近
又報爲颶風擊碎不若海上揚山殿前窩集反
可船舶也吳淞江口及劉家河出海迂回又非
船舶防賊處所議者欲分乍浦之船以守海上
揚山蘇松之船以守馬蹟定海之船以守大衢

則三山品峙哨守相聯可扼來寇而又其外陳
錢山尤爲賊衝三路之要宜各設官分守每于
風汛時月巡撫海道等官相參巡察有警則我
大船火器衝截賊來使不得越過各島則彼毒
無可施而內地安堵矣此海防之一也夫直隸
與浙名雖異地而實則一家若不設官總理則
彼此自分門戶故必其守陳錢分守馬蹟等三
道而後賊無遁情兵可夾擊合設總兵一員駐

劄定海副總兵一員駐劄金山寧紹設參將兼
守大衢杭嘉設參將兼守楊山蘇松設參將兼
守馬蹟每遇風汛時月總兵屯舶陳錢外島及
督各路參將分守三山仍會哨陳錢壁下雖分
信地而聲勢聯絡如常山之蛇首尾無弗應矣
此海防之二也夫總兵駐劄海上若不藉多船
隻無以充戰守之具今沿海等府倩造福蒼等
船不下數百除臣又咨行總督軍門差官調廣

東新會橫江船東莞大烏尾船二百艘前來聽
用外恐一時遠涉未到臣又查得寧紹台溫先
前捕魚海船及下八山採捕等船并蘇松捕魚
沙船合令照舊採捕但聽海道衙門處置編排
與各福蒼等船悉聽總兵官分布要會閒時操
練有警則以八漿等船相幫截殺候造船充用
再議罷之其船隻多寡視兵數爲定限此海防
之三也海上旣備然沿海衛所不嚴加防護則

其守不繼洪武間信國公湯和及江夏侯周德興築浙江等處沿海備倭衛所巡司等城以百數三丁調一爲戍又命南雄侯趙庸招蛋戶島人漁丁買豎自淮浙閩廣盡籍爲兵以浙言之寧波一衛設十千戶所處應招之人蓋軍伍之充如此法久人翫虛糜月糧衛所諸城僅存老弱是以前年臨乍青南之城相繼致陷也據松江府知府方廉申稱海防舊制金山衛西至乍

浦內有獨樹等營各設守禦官軍一百四十員
名東至青村所內有金山等營共三百九十員
名又內設墩臺塘鋪瞭哨守望等軍今議欲修
復舊伍合將見募鄉兵選足一萬歲支半糧免
其身役仍量查閑田給與耕種卽古寓兵于農
之意據此則沿海府衛如寧波近海金塘大謝
岱山等澳皆可查給如此則軍伍充足藩籬完
固寇不敢窺矣此海防之四也夫出入波濤冒

不測之險人情所甚不堪然臣嘗思之地里有
險夷而土著者無險人情有利害而利重者忘
害若使各陞調官軍必於沿海衛所自少生長
身履目擊雖或稍遷異地事無弗同也至其乘
危冒險轉戰窮追若只同常廩止以常格論功
其視內地輕重難易之間殊有不得其平者今
須多處行糧豐其犒賞若總兵官能使賊船不
得登岸而于海洋擒斬首級得敘致異格各軍

人等比內地所獲功次倍論如止獲賊船亦以
大小論級如此則人皆增奮而無不堪之情矣
此海防之五也臣奉 使以來咨謀詢度海防

長策其視遠調客兵計其損節勞費之數不啻
十百千萬除臣會同巡撫都御史胡宗憲議處
相同外仰惟 皇上神明獨鑒更新用人當事
諸臣正惟鑒往思來以圖協忠報 主之會如

蒙 勅下該部詳議總參等職各降勅責任并

勅督撫官每月奏報防守日期稽查激勸以紓
南顧臣等不勝幸甚八月初八日奉 旨該部
看了來說

賊情疏

奏爲軍情事除臣前奏常熟嘉定之賊該參政
任環等督率各屬官兵在于海洋擒斬盡絕止
遺犯杭之賊奔投柘林出海求遁該臣等督令
彼此僂力夾攻該參將盧鏜等出洋邀擊哨至

許山外洋哨見賊船一隻行使兵船向前奮敵
生擒倭賊一十七名斬首三十五顆總兵俞大
猷同日統領各船在大赤洋追及逃寇衝沉賊
船二十三隻擒斬首級五十餘名顆南滙把總
婁宇在柘林頭墩追及賊船一隻斬獲首級六
十一顆又俞大猷報探得柘林賊船尙有十七
隻在洋本官統兵勦逐斬級一十九顆餘賊驚
惶卽時開洋去訖又嘉定知縣楊旦稟稱該縣

逃回民人倪淮供于嘉靖三十三年五月內被倭賊攔搶上船跟到彼處只見漳溫兩處人無數在彼衣帽言語一般說這裏是日本國所管地名五斗山種植稻禾菰豆大小二麥菜蒜等物但來打劫俱是漳州人指引船中俱有倭子做主如要來者先送錢一千文與船主今年四月二十一日眾賊合伴共有七百餘船開洋大者每船二三百人小者三四十人各自備飯米

在海十一箇日每日西南風不便喫盡飯米復
又轉去至六月十四日重開前船行使遇先來
倭船二十一隻回去各相招呼問信其回船上
人說今年不比上年大唐官兵十分兇狠三分
中被他殺了一分眾皆驚駭就轉者不知其數
止有三船前來約賊二百五六十人收船舶柘
林港口淮潛涉水逃命回家及蘇州府知府林
懋舉等會問得生擒倭賊大郎帥等招稱倭賊

三千餘人船二百餘隻于本年五月初五日一同開洋四五日海水碧清拋描不得忽遭狂風大浪黑霧漫天打散各船不知去向止存二隻隨風飄泊松江八團地方登岸爲盜等情又松江府報賊船十七隻因開洋前去百里被官兵打急復回柘林海灘有賊二三百登岸放火臣嚴加督察并咨行督撫務要併心僇力旦夕掃除以靖海甸臣謹以軍務賊情逐一具實奏

知奉 旨兵部看了來說

勦劇賊疏

奏爲劇賊勦盡事該臣先已具 奏柘林遁寇
陸續擒獲并復回船隻嚴督勦捕外隨據直隸
總兵俞大猷呈內開柘林倭寇船隻于八月十
三日盡數開洋遠遁卽今巢穴已平地方少輯
又據直隸蘇州府報本月十五日有倭賊五六
十人勇悍異常自溧水宜興無錫突至許墅鈔